

畿

輔

安

瀾

志

畿輔安瀾志

臣王履泰恭纂

衛河卷四

附載

老黃河古鬲津河也首起直隸元城縣入山東冠縣
界循陳公隄而北逕山東館陶縣至臨清州逾會通
河繞舊城威武門外始有沙河之名北至管家新店
入清平縣界又北至夏津縣界入恩縣境始有河形

東北流逕苦水舖平原縣之看樹墳至趙家莊轉入
德州之青演寺後又東北流逕甜水舖至九龍廟有
四女寺減水壩引河入之又東北至避雪店行五十
六里入直隸河間府吳橋縣之西南境東北流逕岔
河分爲二支其一支東北流逕千佛閣入於鈎盤河
其正支東北流逕王泉莊有哨馬營滾水壩支河水
入之卽鈎盤河也又東流逕溝店舖則有漫河之水
自東南來注之又東北逕黃家鎮入寧津縣西境又

東北逕縣西北隅之馮家莊入天津府南皮縣之東
南境河流二縣之間土壤交錯自南皮縣東北流間
關於鹽山慶雲並山東樂陵縣境凡五十四里又東
流入慶雲縣西境又東逕慶雲縣城南又東流北轉
至南臺橋復入鹽山縣東南境又東北逕白鵝棗莊
入山東海豐縣境又東北逕板橋宣惠河合無棣溝
分岔河明白窪之水東流入之又東北逕三官廟至
馬谷山前由大沽河口入於海

芳輿絕襄宋時大河出滄景之間今吳橋縣南地名瀾陽卽大河匯流處又古黃河在寧津縣西三十里廣約一里自吳橋縣東南流入界又東北流入南皮縣境兩岸廢隄隆然屹立居人謂之卧龍岡又南皮縣東南五十里曰古黃河自南皮縣東北境王家橋入山東樂陵縣界又東北逕狗獐寨商家橋舊縣鎮鄧家橋北卽鹽山縣界又東北至王雙全仍爲樂陵縣界又古黃河在鹽山

南四十里地名孟家店南距縣四十里逕慶雲縣
北入縣境崔家口由西達於海久淤無水傳係鬲
津（一統志舊志寧津西三十里有古黃河自吳
橋縣流入疑卽漢時鬲津河也宋時爲大河所經
又舊志有古河自南皮流逕鹽山縣南四十里
又東逕慶雲縣北十二里又東至崔家口與鬲津
河會經海豐縣入海疑卽無棣河或以爲古黃河
寧津縣志河道志云鬲津在東光鬲縣界中寧

津卽其地也 山東通志自德州至樂陵縣爲鬲

津故道自直隸鹽山縣至東省海豐縣大沽河口
則唐時無棣溝也今成爲一渠通謂之老黃河

謹案宋史河渠志嘉祐五年河流派別於魏之第
六埽曰二股河至魏恩德博之境曰四界首河熙
寧二年從宋昌言請開濬二股於是東流盛而北
流閉元豐四年河復注於御河於是北流盛而東
流閉元符二年河大決於內黃於是并勢北行而

東流遂絕今老黃河故道發跡臨清東門之外循

陳公隄

宋陳堯
化築

東北行彌望沙磧底岸莫辨至恩

縣境內始有河形又東北至德州城東南號老黃

河河形大顯西接四女寺引流迤邐東北行五十

六里入直隸吳橋縣境逕城南玉泉莊東會鈎盤

河又由寧津南皮鹽山慶雲達山東海豐入海明

永樂十年尚書朱禮於德州西北開泄水支河一

道東北至舊黃河一十二里內五里係溝渠五里

係古路二里係平地開通入海豐之大沽河入海

凡四百五十七里

明史河渠志宋禮言衛輝至直沽河岸底薄若不究源潮流但

務隄築恐復決消勞費益甚會通河抵會魏家灣與土河連其處可穿二小渠以洩於土河雖遇水

漲下流衛河自無橫溢之患德州城西北亦可穿一小渠蓋自衛河岸東北至舊黃河上有二里而

中間五里舊有溝渠宜開通七里洩水入舊黃河至海豐大沽河入海詔從之

宏治二年

鄒御史白昂復於德州之南四女寺鑿裨河至九

龍口入舊黃河歸海嘉靖十五年工部郎中楊旦

於四女寺建閘以時啓閉

俱見明實錄

自萬厯二年以

後漳水不復從館陶入衛運河各汛漲溢無虞於是舊制盡廢

本朝康熙三十六年漳水又入於衛四十四年重建四女寺減水閘雍正四年改滾水壩九年續挑德州引河入九龍口并疏老黃河故道十三年東省奏請於德州城北哨馬營建滾水壩挑引河由陳公隄至曹家口入鈎盤河東北流至吳橋縣之玉泉莊是則山東四女寺壩卽白昂所開之裡河也哨

馬營壩卽宋禮所開之支河也歸於正河由西南而東北注自高趨下兩岸堅實中溜寬平有銅幫鐵底之目蓋卽宋時所謂二股河矣金世宗大定間河勢衝決南徙迄章宗明昌五年二河遂涸今則復爲宣洩運河三汛之要道 〔又案〕禹貢逆河入海之道多不可考據史所載大河之經大各天津二府境者有二道一由吳橋景州東光南皮滄州青縣靜海天津入海此爲西漢時大河故道亦

卽北宋時合永濟渠北流之道也

今爲南一由德運河

州入直隸吳橋縣東北逕寧津南皮之東厯鹽山慶雲而達於山東之海豐是爲漢時爲馬河故道亦卽唐時馬頰河故道在北宋爲二股河四界首河東流之故道也宋元符元年河決內黃而東流絕金明昌五年河決陽武而北流亦絕

本朝於運河東岸四女寺哨馬營各造滾水壩開引河以洩秋汛盛漲因故迹以利導之數百年之廢瀆

轉成運道洩水之區非天下之至精其孰能與於此

龍潭

清縣河志在縣西南五十里嘉靖元年大水匯成旋塞隆慶元年復匯成潭深不可測或以爲龍潛於此

謹案寧津縣西北三十里老黃河東岸之東亦有龍潭水深莫測苦寒不凍

田家窪在清河縣境

千頃窪在景州東北四十里自景州八里莊流入東
光縣西南境逕崔家莊周家莊談家莊北至周同家
莊入於漫河乾隆五年開濬俗名樂河蓋積水既消
而民獲播種之利也

琵琶灣在景州衛河西岸乾隆二十四年秋汛奔濤
急下衝灣作直化險爲平

謹案此灣見宋史河渠志卽程昉所欲開而功不

成者也

漫河在吳橋縣東南上接德州境河形湮失不可考
矣東北流逕溝店橋入於老黃河

謹案吳橋縣志龍灣在城東二十里淺深斷續流

衍東匯寧津縣谷家河方輿紀要龍灣在吳橋縣

東十二里

當是二十里之誤

或曰古大河餘流也東注寧

津縣界亦曰谷家河下流合於土河老黃河東岸

有谷家莊此河無分支別派惟有各渠瀝水注入

土河蓋隨地而名今入老黃河不入土河又與昔異矣

鈎盤河在吳橋縣西南首起山東德州曹村之哨馬

營衛河滾水壩引河也

水自哨馬營逕魯家莊出曹家隄口循古鈎盤河東北流

入東北流至縣西南三十五里之念高莊入境又東

北流逕縣城南二里之大隄口橋又東逕千佛閣老

黃河支流來會又東逕玉泉莊入於老黃河是名三

岔河

謹案水經注大河故瀆東出亦通謂之篤馬河故渠東入般縣爲般河蓋亦九河之一道也漢書稱公孫瓚破黃巾於般河卽此瀆也漢書地理志平原郡般如淳曰般如面般之般爾雅說九河云鈞盤郭璞以爲水曲如鈞流般桓也郡國志安德郡般泊般城有故般河孔穎達尙書疏簡潔鈞般在東光之南鬲縣之北其河填塞時有古道通典古鈞盤河在樂陵縣東南元和志陽信縣鈞盤河卽

九河之一褰字記鈎盤河在樂陵縣東五十里從
德州平昌來金史地理志山東景州將陵有鈎盤
河山東通志鈎盤河故道在將陵縣東四十五里
名盤河店猶有瀦水吳橋縣志鈎盤河卽古黃河
故道在縣城之南今此河所行不遠卽入老黃河
蓋唐宋以來大河決入之水所謂新河而被以舊
名也

宣惠河古黃河支流也首起吳橋縣西北十五里之

郝家窪東北流逕李上學莊北趙尾家莊西乾隆五
年挑濬成渠始名曰宣惠又東北行三里劉子牙莊
渠水自北來入之迤北行轉東逕大張路橋又東北
穿徐王窪又北逕石家橋入東光縣東南境又北逕
郭家橋王家橋又東北逕雙柳樹則有古沙河自吳
橋縣東北流入焉又東北逕柳樹張家庄又東行入
南皮縣東南境之劉蛤蟆莊分爲二其分支東北流
入南皮縣界土俗名馬頰河其下流入滄州爲石碑

河其正支又東行三里餘復入東光縣東北境又東行二十餘里復入南皮縣東南境之伯家莊又東北逕金砂崗龍潭又東北行六里餘入滄州東南境之張家屯又東北逕宋村東又東北逕新縣南又東北逕老隄口又東北穿燕子窪入鹽山西南境又東行九里是爲劉公渠又東逕鹽山縣城南又東北逕大王舖又東北逕高家村又名高家灣則有分岔河之水入之又東北行八里則有無棣溝之水自南來明

白澤之水自北來入焉又東北入山東海豐縣境其
下流入於老黃河

漢書地形志東光有胡蘇亭 水經注清水東至

東光縣西南逕胡蘇亭又東北右會大河故瀆

元和郡縣志胡蘇河在饒安縣西五十里 齊乘

東光縣東連滄州有古胡蘇亭又滄州之南有大

漣澱西踰東光東至海非古胡蘇歟 禹貢錙指

齊乘以滄州之大漣澱爲胡蘇河得之 方輿紀

要南皮縣西門外有廢胡蘇河 吳橋縣志胡蘇

河在縣東三里許此河舊從馬頰直下南皮

譚案宣惠河山東光縣分支者有王莽河之號上

流去鈎般河不遠爲古黃河之支流乾隆五年於

劉蛤蟆莊南改挑河身經東光引入南皮此河半

係沙河舊流又卽靳河與胡蘇河故道也久已湮

廢自乾隆五年興修始由靳河歸入胡蘇復歸沙

河又由馬頰河故道導之使東由郭家河廖家河

引入南皮遂爲新渠而命以今名今土人以祁家
窪而下名之曰祁家渠北流至趙尾家莊始名宣
惠河夏秋之交大雨時行山東德州瀝水全注祁
家窪浮流而下村莊多被淹浸而東光縣所屬之
裏頭村冷飯店范家莊等處地勢尤窪受患尤酷
然河自此決漫下注卽散漫無收故南皮滄州被
害滋甚今自冷飯店西至范家莊東止卽以河中
淤土置北岸齊成高埝長五里五分爲滄州保障

歷年加培使河流循軌藉以宣洩十二年挑挑子
河面寬三丈五尺底寬一丈七尺深二尺五寸至
四五六尺不等每歲春融時節勸民力修濬乾隆
二十九年重濬 乾隆十二年水利工程奏畧竊
查天津府屬之滄州地勢最爲窪下爲德州吳橋
東光南皮瀝水匯歸之所向來滄州東南以宣惠
河爲宣洩滄州西北以石碑河爲宣洩直達歸海
年久淤塞每逢雨潦易致泛溢必須挑濬深通暢

洩積水數邑村莊方免潦漫之患查宣惠河應自
東光南皮交界之孫家墩起至滄州鹽山交界之
燕子窪止計長六十餘里於河底抽挑子河面寬
三丈五尺底寬一丈七尺深二尺至六尺五尺不
等石碑河應自滄州蔡家窪起至北減河尾會流
處止計長一百六十餘里挑面寬四丈五尺底寬
二丈五尺深三尺至六尺不等俾滄州等邑漑水
循軌暢流入海永除水患 乾隆二十八年水利

工程奏畧查運河之東有宣惠石碑二河皆以分
消吳橋寧津東光南皮滄州鹽山各州縣漑水宣
惠河由新集老黃河河亘二百八十二里零石碑
河山母猪港與捷地減河會亘一百五十四里零
均應加挑一律深通宣惠河估挑面寬六丈底寬
四丈深四五尺不等內金沙港地勢高亢挑深八
九尺者計長一百二十丈石碑河估挑面寬五丈
底寬三丈深三四五尺不等

沙河古黃河支流也上源湮廢不可考首起吳橋縣西南之小馬廠東北流逕縣東北界入東光縣南境又北流逕雙柳樹入於宣惠河

謹案方輿紀要王莽河在吳橋縣東北古屯氏河也此河上無來源蓋古大河之分支後爲沙湮因名沙河起自縣西小馬廠東北流逕新鎮店石佛寺崔家莊馬家庵梁家莊梅家莊沙窩李家莊梁家莊徐家莊東北入東光之萊園孫家莊吳家莊

龐家莊劉家泡子莊陳家莊至雙柳樹西而入宜
惠河人號爲古黃河河頭起自西鄉本與鈎盤河
相距僅數里乾隆五年開挑宜惠河其地遂淤廢
近年復疏通之以洩東光縣東鄉瀝水

谷家河

〔北河續記〕吳橋縣谷家河西岸有龍王廟舊時水
深不測苦寒不凍有龍窟旱潦禱之輒應今湮

〔謹案〕引河東岸挑引河分秋汛盛漲而寧津接吳

橋縣卜游傍厓古岸堅厚無事幫培間有缺口民
力修築其挑濬事宜吳橋南皮鹽山慶雲四縣一
體奉行東岸有谷家莊吳橋縣志稱谷家河者卽
此又東北行二十餘里西岸有龍王廟

夾河

畿輔通志在吳橋縣東北十五里三水合故名
謹案舊最吳橋縣境虹駕雙河蓋卽老黃河與鈞
盤河滙流得名在縣東北境惟此爲合耳非別有

下河也

吳川卽古黃河也

吳橋縣志在縣城南門外古黃河隄南金始於此
置縣川上有橋縣因以爲名

謹案禹貢雖指引吳橋縣舊志古南津河在縣西
里許亦名吳川卽新志所謂古黃河也

清水灣在吳橋縣西北衛河東岸

白草窪在吳橋縣城西南三十里

謹案漕運記程吳橋縣衛河西岸曰白草窪長一里零卽此窪也

趙虎莊渠在吳橋縣東南二十五里漫河西岸乾隆六年開挑自西至東長二里有奇

李芳莊渠在趙虎莊渠東漫河東岸乾隆六年開挑自東引西長二里有奇

王道入莊渠在吳橋縣東南十八里漫河西岸乾隆四年開挑自西至東長一里有奇

趙塞渠在王道人莊渠東北十里漫河東岸乾隆六年開挑自南引北長二里有奇

宋家橋渠在吳橋東二十里漫河西岸乾隆四年開挑自南轉西長五里有奇

以上五渠引瀝水入古漫河

時家莊渠在吳橋縣西南二十餘里老黃河西岸乾隆五年開挑自西而東長四里

大吳家莊渠在吳橋縣南三十里老黃河之南乾隆

四年開挑自南而北長七里有奇

劉漢家莊渠在大吳家莊渠之西四里老黃河南岸
乾隆六年開挑長二里有奇

以上三渠引漑水入老黃河

劉子牙莊渠在祁家窪之東首起李上學莊東流會
祁家窪其下爲宣惠河有渠溝自滄州九撥橋起至
南皮縣之石碑河止長二千九百丈乾隆十二年十
七年兩次開挑面寬六尺底寬四尺深三尺宣洩畢

呂二窪並安家楊家王家黃家等窪以及桃園泡頭
半壁店各窪瀝水入於石碑河入海

乾隆六年知縣端木長洪開劉子牙莊渠會歸宣
惠河碑豎邑西上村等莊地勢窪下西北向有洩
水古渠今名宣惠河上年奉檄修濬深通而離河
稍遠者仍多滯積經營疏導自上村劉家西路起
向西由絲爪張家莊後園溝從莊西北大路入古
唐河景家窪轉向東北至楊家橋接入宣惠河其

長二千七百五十丈應挑口寬一丈二尺底寬一丈約深一尺五寸從此永無墊矣

徐王窪在吳橋縣北四十里宣惠河東岸

梅家窪

二統志在吳橋縣東北三十里又有曹家窪在縣西十里今皆湮廢

謹案縣東北沙河老黃河之間有梅家莊窪當在其處

米家河在寧津縣南十六里自山東德平縣界之呂家莊流入縣西南境東土河遲河流河黑水灣

方輿紀要土河在寧津縣南二十五里其上流自山東德州經德平縣西北流入境內相傳卽古篤馬河又東流入山東樂陵縣界縣東四十里有遲河又有流河俱入於土河謂之三渡口黑水灣在縣南十五里今堙 小谷口蒼叢篤馬河在德州城東四十里河水常枯如濟寧馬溝水漲自東昌

魏家灣溢出循故道東北注於海

謹案明實錄永樂十年四月尚書宋禮奏相視會

通河至魏家灣

在博平縣

與土河相連宜於彼開二小

河以泄於土河十一月戊戌行太僕寺卿楊祗言

吳橋東光興濟交河諸縣及天津等縣屯田雨水

決隄傷稼竊見德州良店驛東南二十五里有黃

河故道州南有土河與舊河通若於二處開河置

閘則水勢分可以便民時土河已置閘上命工部

侍郎蘭芳往經理之今寧津縣屬一望平曠舊迹
皆湮城南十五里微有河窪久報升科夏秋霖潦
通流不滯居民多種高粱是以無妨收穫按籍求
之當是土河黑水灣之故迹縣南米家河俗以沿
河有米家莊故也卽土河舊昔時河流長遠入自
德平出於樂陵未可知

永濟河亦名永濟渠

東光縣志渠在縣西其流莫測今漸平舊長蘆縣

在此渠之西唐開元中移於此渠之東（南皮縣志）永濟河在半壁店北

謹案此河本唐時修治唐書地理志滄州清池有永濟隄（一）永徽二年築又南三十里有永濟北隄開元十六年築（寰宇記）德州將陵縣永濟渠在縣西十里蓋自彼界流入者又永濟渠在東光縣南二百步（禹貢）雖指曰南蓋西字之誤（宋史河渠志）塘灤下明分永濟渠爲二矣（金史地理志）景州將

陵吳橋並有永濟渠耆叢東光縣有永濟渠其流
莫測或曰千頃在今通河之西卽永濟渠故道斯
言得之今永濟渠自景州之八里莊入東光縣西
南境由崔家莊周家莊談家莊北至朱同家莊岔
入運河其上下並皆湮廢所僅存者此耳

馬頭村洩水溝在東光縣西三里乾隆五年疏通積
水開挑成溝宣洩瀝水南自新莊厯南關至積水灣
入於宣惠河長八里

裏頭村東南洩水溝在東光縣東五十五里與南皮縣接壤乾隆五年開挑東由張家莊高家莊至孫家莊之西其長六里順流正北入於宣惠河

張二家莊洩水溝在東光縣西十五里由薛家廟鄒家莊其長七里東入於漫河乾隆五年開挑

蒲窪在東光縣東北三十里之蒲窪莊宣惠河北岸下接馬頰河

謹案一統志景州西七里有蒲窪蓋異地而同名

者也

清水窪在東光縣西今涇

緄輔通志其深莫測漸平

新挑溝在交河縣東北上承漫河東河古沙河亭子
河清河各河下注杜林鎮入夾河窪

毛河

謹案方輿紀要在南皮縣東北流入滄州界以洩
永濟渠之水又云在滄州西南五十里亦名毛屯

氏河逕鹽山縣城北入海考是河唐開元十年所
開蓋因漢屯氏之舊迹而加其功仍隋人之呼故
被以毛之名南皮縣志以爲卽覆鬴河者非計其
道里方位殆卽今之石碑河也紀要謂逕鹽山始
入海今不可考

王莽河又名馬頰河在南皮縣東南十五里或曰古
屯氏河也上接東光縣境乾隆五年自劉蛤蟆莊分
宣惠河支流東北逕塔馬寺烏馬營折而西北逕劉

旺金莊又東北逕徐郎中莊又東北逕劉天元莊蓮
花池出境入於滄州之蔡家窪下流名曰石碑河長
三十里

謹案南皮縣志王莽河卽馬頰河疏濬可洩東南
之水方輿紀要南皮縣東南數里有廢王莽河卽
是此河但禹跡旣不可考而唐之馬頰河亦不經
此蓋臆說也所謂屯氏河者近是

銀鈎河亦曰鈎盤河首起南皮縣西南二十里之畢

家窪東北逕安家窪逕清水窪黃家窪又北逕桃園窪又東北逕縣城北之穆家店有店子橋跨其上又東北穿泡頭窪祁家窪又東北行八里入滄州西南境有九撥橋跨其上又東北穿郎兒口入於石碑河謹案此河在南皮縣境者微有河形入滄州而河形遂泯方輿紀要引舊志云縣城北有太史古河禹貢錐指非之曰太史河自昔無考是矣此是水經注之迴河故瀆東合於浮水者也續通輿南皮

縣西去景州六十里縣北有迎河河北有故皮城
南皮縣志謂銀鈎河卽鈎盤河在吳橋西南爲古
黃河故道齊乘欲以無棣縣之陷河當鈎盤河後
人猶疑其非而乃更在西北之南皮尤屬附會且
銀鈎之名亦不典元史謂郎兒口減水故道名曰
盤河大約古黃河支流後人因其舊瀆以洩御河
漲水土人遂被以斯名今其流斷續形迹就湮去
古旣遠不可復辨矣

迎河

方輿紀要在南皮縣北舊有逆河瀆自縣境東流入清池縣界合於浮水今湮

謹案禹貢錐指引地理志渤海郡莽曰迎河南皮縣莽曰迎河亭溝洫志亦云同爲迎河入於渤海迎河卽逆河說者謂莽多忌諱故逆曰迎也則是既有逆河不必更列迎河之名逆河既淪於海諸志乃有逆河又有迎河且妄爲之分疏水道皆可

笑也

寒水井

太平寰宇記在南皮縣西一里魏文帝與吳質書云憶昔南皮之遊馳騁北場旅食南館浮甘瓜於清泉沉朱李於寒水卽此井也

謹案此井今在城西南隅土人覆以大石盤其味甚苦吳賀書寒水與清泉對舉成文未必遂爲井名當是後人因此附會耳又南皮縣志謂是黃帝

時穿伯益所修更荒誕矣

覆盆井亦名古盆井亦曰龍井

南皮縣志劉址詩何年龍井傍龍崗五龍崗在城南五十里相傳爲神女產龍處下有龍灣

謹案河間府舊志以爲傳說所開亦不足信也

畢家窪在南皮東南二十里王莽河之所經也又東北八里爲安家窪其接連者爲曹家窪一名曹家河北又東北一里爲清水窪又東一里爲黃家窪又東北

接連者爲杞園窪又東北十里爲泡頭窪又東北八里爲祁家窪今皆微有河形而已其下流入於石碑河

趙家窪在南皮縣東南六十里其接連而少西北者曰崔家窪又由崔家西北一里許曰黑龍村窪其下流入東光縣乾隆二十八年村民自開溝一道由杜家莊入東光縣境之裏頭村長二千八百丈寬八尺深三尺入於宣惠河

太史河在鹽山縣西北二十餘里自滄州東南之楊家龍堂入縣西北境高家龍堂以上河形不可尋究今是河首起新店東北逕寒裏馬大口萊園至舊城折而東南行逕魏郭莊大郭莊東西曲河常豐村蘇集鎮凡八十餘里入山東海豐縣境入於老黃河

二統志舊城鎮在縣東北三十里明洪武九年移治香魚館卽今治

謹案禹貢雖指云太史河自昔無考明統志云在

南皮縣北此臆說鹽山舊志亦無此河今乃因明
統志而實之遂以爲九河之一非也畿輔通志太
史河自漢以上未知所在而忽得之後人自不足
據此河亦毛河浮水之分支今據地勢當自滄州
忤龍堂後遙接蔡家窪之流而入境也

無棣河在鹽山縣西南其源不可考首起西南五十
里之舊縣村東北逕李法師堂入慶雲縣西境又東
北逕黑牛莊則有黑牛王溝之水自老黃河北流分

注之又東北逕刁莊復入鹽山縣東南境又東北逕
清水溝村入於宣惠河又合流東北行入山東海豐
縣境歸老黃河

謹案唐滄州清池有無棣河無棣縣有無棣溝通
海尋其道里當卽此河

分岔河卽無棣河之岔支也首起鹽山縣西南九十
里之孫家沙窩又東北逕尚家寨孫村大呂宅傅家
莊韓家莊茄子劉莊狼獾莊凡六十餘里入於宣惠

河

謹案一統志無棣河自南皮縣流逕滄州又東逕鹽山慶雲二縣入海豐縣界水經注清河自東光

縣北無棣溝出焉今經南皮縣故城南又東逕樂

亭北又東北逕新鄉城北

方輿紀要高樂城在南皮縣東南四十里俗名

思鄉城今攷魏書地形志浮陽郡饒安有西鄉疑卽新鄉也

又東北分爲二瀆

又東逕樂陵郡西又東逕苑鄉縣故城南又東南

逕高城縣故城南

方輿紀要在鹽山縣南六里

與枝瀆合枝瀆

上承無棣溝南逕樂陵郡西又東南逕千童縣故

城南

方輿紀要在鹽山縣七十三里輿地志高城東北有卅兮城漢因置千童縣

又東

北注無棣河又東北逕鹽山縣東北入海元和志

無棣河在饒安縣南二十里

魏書地形志浮陽郡饒安有無棣溝方

輿紀要饒安城在滄州東北七十里寰宇記無棣河一名赤河在饒

安縣北二十五里東流逕無棣縣南又東與鬲津

枯溝合而入海舊志有古河自南皮逕鹽山縣南

四十里又東逕慶雲縣北二十里又東至崔家口

今老黃河行其北與鬲津河曾經海豐縣入海疑卽無棣

河或以爲卽古黃河也此所云水道本之水經注故與見今所行之水道稍有不合此河兩經唐開自宋二股河東流已後其纏絡非復唐舊矣然水經注云分爲二瀆今現有分岔河則其迹猶可追尋者上源不起南皮下流爲老黃河所隔惟注宣惠不入海豐今昔固殊途也

高家灣卽宣惠河下尾在鹽山縣東南四十里

浮河在鹽山縣極北境往時浮水逕舊滄州城南東

北行至大浪泊

滄州村名

又東流八十里入鹽山西北境

今日大浪泊西北三里北流折東入三角窪爲石碑河下尾其入鹽山縣境者故迹不可尋求首起鹽山縣西北之常郭鎮東北流逕韓村鎮又東流逕郭隄城又東流逕羊二莊又東流逕小王家庄又東流逕武帝臺又東流九十里入海

謹案郭隄城在縣東北七十里又名合騎城漢公

孫敖封合騎侯是也武帝臺在韓村東北三十里
世傳漢武帝築望海求仙今惟土堆高又餘上建
八蜡廟滄州東北有望海臺亦名漢武臺魏氏土
地記曰章武縣東一百里有武帝臺南北有二臺
相去六十里臺高六十丈考其道里方位滄州者
當是南臺此卽北臺也滄州又有浮水故城天津
府志在州東五十里當在舊滄州東北今其處尚
有浮河村而城已湮矣

燕子窪在鹽山縣西南周數十里與滄州東南接境
一名燕子口

謹案方輿紀要縣境舊承無棣溝下流大小羣州
悉附以入海無棣溝旣塞每以漣潦爲患萬厯四
十二年邑人劉子誠開渠自燕子口至高家灣四
十三里導入古黃河直達於海今宣惠穿燕子窪
過縣城南東北至高家灣卽劉子誠故迹也故宣
惠河之在鹽山縣境者又有劉公渠之一名

泊莊溝在鹽山縣城東北起自溝頭東流至留舍村

又東南逕許家莊又東南逕楚窩莊西之柳樹窪又

東南至張家河

卽史家河

龐家三節河

卽劉十家河

又東逕魚

窪齊家溝入於明白窪長三十里乾隆十六年十九
年兩次開濬

明白窪在鹽山縣東周數十里窪東有溝名明白窪
溝東南流逕新淤村宋村程村尤家莊窩頭莊至高
家灣西入於宣惠河

黑龍灣在鹽山縣南十八里距宜惠河十八里東北
流入於宜惠河

鹽山縣志黑龍灣夏秋積水成川有土臺高丈許
上有龍王廟晴雨多應

鬲津河

方輿紀要在慶雲縣南流逕城東下流入於海唐
永徽初刺史薛大鼎所開

謹案老黃河卽古鬲津河已見前其在直隸境者

首起山東恩縣之四女寺入自吳橋縣流逕寧津
南皮鹽山慶雲又逕鹽山入山東海豐縣歸海紀
要所云當卽此河然云唐永徽初開當是薛大鼎
曾經濬耳

岔河老黃河支流也在慶雲縣東北二十里自老黃
河北岸卧龍岡分支北流逕土可忠莊趙家莊折東
北流逕東麻灣前麻灣大麻灣則有褚家窪之水東
流入之又東北流逕托家莊南臺入鹽山縣東南境

又東北流逕北臺又屈而東南流仍入於老黃河

汶河

方輿紀要慶雲縣西南有汶河卽鬲津河之支河
謹案此汶河疑卽岔河然岔河在慶雲東北紀要
云西南今慶雲西南又無此河姑兩存之

胡蘇河

方輿紀要在慶雲縣西南其流逕鹽山海豐境入
於海二統志胡蘇河舊志在縣西南十二里流

逕分水鎮東北十三里與鬲津河合

謹案此河今雖就湮猶微有河形在老黃河之南
自山東樂陵縣流入縣東南境東北行逕戴家莊
賈家莊于家莊袁家莊小陸莊入於老黃河

秋苴河

方輿紀要慶雲縣東舊有秋苴河直抵海豐

謹案漢書功臣表武帝封韓陶爲荻苴侯朝鮮傳
是秋苴表誤今此河不可考

紀家河

方輿紀要慶雲縣西有紀家河亦流入於鬲津河

謹案此河今不可考

覆鬴河

方輿紀要在慶雲西 二統志滄州志有覆釜河

在慶雲縣南二十二里卽鈎盤北派自樂陵縣流

入又東入海豐縣界

謹案此河土人名鈎盤河在慶雲縣西南當胡蘇

河之南亦自山東樂陵縣入境東北行逕小馬家莊小丁家莊丁家莊馬家莊分水楊家莊志門劉家莊寇家莊劉家莊會高墓臺溝入於老黃河其流甚細又此三河逕道交通畿輔通志引鹽山縣志一統志引慶雲縣志俱云鬲津河自慶雲北入鹽山界崔家口又東逕海豐縣入口崔家口在老黃河東岸舊志所謂古河卽老黃河矣汶河在縣西南胡蘇河亦在縣西南紀家河在縣西鈎盤河

亦在縣西此二河方位正相值其又有覆釜一稱
者則以滄州志謂覆釜爲鈎盤之北派實卽一河
而亡名故紀要于縣有覆釜無鈎盤通典馬頰覆
釜在平原郡界又安德縣有覆釜河蓋自彼境流
入者然此亦書時所開卽宋東流之故道如以爲
禹迹在是恐非

亭子河在慶雲縣東南首起縣東南二十里之東張
莊北流逕火燒舖又北流會柳行張莊溝又東北流

逕蔣家橋而入於馬頰河乾隆五年重濬長二十四里今漸淤

獻河一名陷河卽古馬頰河亦卽篤馬河故道也今亦稱馬頰河首起山東清平縣汶河開口由高唐德平逕樂陵入直隸慶雲縣西南境流逕杜家莊石佛寺又東流逕紀王橋又東流逕板達營又東北流八里折而北流逕棗園橋入海豐縣境交錯於慶雲海豐二縣之界凡十餘里復入海豐縣境又名大巨河

至月河口入於海

齊乘無棣縣

謹案今山東海豐

有陷河濶數里西通德棣

東至海

方輿紀要獻河在慶雲縣南三十里縣

西北境之水多滙於此經海豐縣引流東注於海

齊乘陷河蓋卽獻河上源也

謹案禹貢錐指通典云馬頰覆盆在平原郡界寰

宇記云馬頰河逕脩縣界是也又云篤馬河卽古

馬頰河人皆斥其謬然唐自馬頰河出澶州清豐

縣界東北流至平昌縣合篤馬河二水合流并得
通稱以篤馬爲馬頰不可爲謬謬在一古字指爲
九河之第三耳元和志馬頰河在安德縣南五十
里又在平昌縣南十里久視元年開決亦名新河
近志平原商河陽信界中並有馬頰河皆唐之馬
頰也在鬲津之南與九河無涉齊乘東無棣縣北
有陷河澗數里疑卽鈎盤河案此河自樂陵分爲
南北二派

續輔通志卽河間寧津縣土河之海豐
下流逕山東樂陵八慶雲縣境

舊志南派在縣南名鈎盤河經霑化縣北又東至
久山鎮入海新志北派在縣西北三十里自慶雲
流入又東北逕馬谷小山前抵土河入海今縣北
盤河村尚以此爲名蓋北派卽齊乘所謂陷河也
或曰陷河卽篤馬河之別名許商云在九河之南
齊乘指此以爲古鈎盤恐非然許商亦就上流言
之耳鬲津出鬲篤馬出平原鬲在平原之西北故
曰孫禁所欲開者在九河南篤馬河蓋其下流則

商固未之悉也篤馬首受大河潰溢縱其所之遇
水卽合安知篤馬下流非卽鈎盤之故道乎又慶
雲縣志馬頰河自樂陵縣流入經分水鎮至縣東
南隅入高津河又有篤馬河在縣南三十里卽禹
貢簡河也雖指非之引輿地廣記云簡河在臨津
金志南皮縣有簡河今寧津北與南皮接界謂簡
潔在此理或有之然則篤馬之非簡河亦明矣又
方輿紀要高津枯河在獻縣西二里東北流入故

饒安縣界入海又馬頰河在獻縣東六十里上源
從山東商河縣流入境又有鈎盤河在獻縣東南
五十里上源自山東德平縣流入境蓋後鑿以導
水而附以九河舊名也今悉湮廢斯言當矣鬲津
鈎盤馬頰俱在慶雲東由海鹽入海則不得經獻
縣也獻河土人至今稱馬頰河河身濶數里與齊
乘說正符河南有土隄斷續隆然勢如岡嶺與河
相並而東名長城嶺紀要云舊志以爲齊之長城

或云禹所築九河隄攷此二說均無所據其爲古
人築以防馬頰泛濫年久頽廢未可知也

漫河在慶雲縣西南自山東樂陵縣流入東北行逕
撒家店又東行折北入於獻河

謹案此河不見志乘微有河形未審古何水也

高墓臺溝在慶雲縣西南十里首起高墓臺村東北
流入老黃河長六里有奇

杜樹劉家莊溝在慶雲縣南八里首起杜樹劉家莊

北流入老黃河長三百三十五丈

張家莊溝在慶雲縣南北流入老黃河長三百三十五丈

劉家莊溝在慶雲縣南八里首起劉家莊北流入亭

子河長三百三十五丈

馬家莊溝在慶雲縣南北流入老黃河長五百三十五丈

馬家橋溝在慶雲縣東南首起馮家橋村北流會後

馬家橋溝入老黃河長五百二十三丈

後馬家橋溝在馬家橋溝東北里許西南流入馬家橋溝歸老黃河長二十八丈

窪裏劉家莊溝在慶雲縣東南八里後馬家莊溝之南首起窪裏劉家莊西北流會紀家溝入老黃河長一里有奇

海子窪溝一名海子王家莊溝在慶雲縣東北十里首起趙魁斗莊東北流逕高家橋又東流北入老黃

河長九百六十丈

紀家莊溝在窪裏劉家溝東北二里西南流入窪裏
劉家莊溝歸老黃河長十二里

寶家莊溝在慶雲縣西上接老黃河北岸十里首起
寶家莊南流入老黃河長三百二十丈

黑牛王家庄溝在慶雲縣西北十二里南接老黃河
北岸北通無棣溝長九里

火燒舖溝在慶雲縣東南五里首起火燒舖流注亭

子河入於馬頰河長二百二十五丈

柳行張家莊溝在慶雲縣東十五里首起柳行張家莊溝東流入於亭子河長一百八十五丈

謹案慶雲諸溝始自乾隆五年開挑爲溝者凡十有六歸入各河以資宣洩自後屢加修濬爲利溥焉

白家窪又名大店窪其上流與苗家窪相通在慶雲縣東南四十里

田家窪在慶雲縣東南三十里

苗家窪在慶雲縣南四十里漫河之南周十數里其
下流入於大店窪

榮波窪在慶雲縣東南五十里與山東陽信縣接境
七在陽信縣三在慶雲縣

萊張家窪在慶雲縣西南四十里周十餘里下流入
於獻河

撈魚窪在慶雲縣東北三十里周數十里其半入於

山東海豐縣境兩縣滙水之所鍾也

明月沽在慶雲縣東七十里

方輿紀要東接馬谷山瀕海煮鹽處也

謹案明月沽疑卽撈魚窪半屬慶雲半屬海豐處
扇津故河之間去海尚遠紀要以爲瀕海未知何

據 又案慶雲縣東北三十里有蘇家窪大淀小

淀皆在撈魚窪南與相接連豈明月沽其總名耶

石碑河古浮水也首起滄州東南五十里之蔡家窪

上接南皮之王莽河又其上源則吳橋縣之宣惠河也自東光縣與宣惠河分支入南皮縣東南之劉蛤蟆莊東北行二十八里入滄州東南境又東北穿蔡家窪其北出者爲石碑河乾隆十二年所開濬也河自蔡家窪北出逕邢家莊東北逕楊家橋又東北逕王官屯又東北逕趙家鋪又東北逕舊滄州城繞城四周又東北逕感化屯駕虹橋又東北逕曹家莊又東北逕流口又東北逕丁家河康家莊後曹家莊又

東北逕大浪泊又東北逕茶棚河又東北逕東道安
西道安又東北逕韓家莊又東北逕葛沽塘河又東
北逕七十二道溝又東北逕孔家店又東北逕尙家
莊又東北逕呂家橋又東北流入鹽山縣北之瓦沽
灘又東北逕王御史莊又東北逕王徐家莊又東北
逕周家莊而復入州之東北與北減水河下尾相接
合流入於母豬港又東北穿大溝窪又東北入於
長港與南減水河會流又東北岐口入於海

謹案今之運河爲古河故道沙河首起吳橋縣西南小馬廠南去鈞盤河僅五六里西距運河不及二十里宣惠河首起吳橋縣西南祁家窪西去運河僅十餘里南距沙河亦僅十餘里其上流久已湮沒而按其方位大勢猶可考也今乃以自吳橋東光厯南皮滄州鹽山入山東歸老黃河者爲宣惠河乾隆五年總督孫嘉淦之所定名也自南皮西南入滄州西南境者爲王莽河下流爲石碑河

王莽河在南皮西南微有河形至縣東南河槽始顯下入滄州西南境河身復隱至州東南之蔡家窪河形又著故遂以蔡家河而下別立河名而忘其上源也至於沙河之名直隸土俗凡屬古河多被斯稱而宣惠河又係近時所名循習相忘幾不知其爲大河所出矣石碑河不見志乘按地而求宣惠王莽一河三名蓋用唐所開毛河之半亦卽漢浮水之故瀆也謂之石碑河者元時自九撥橋

之南接南皮畢家等窪所謂銀鈎河者自金大定
以來軍民爭訟不息至元時公議絕堤中斷立碑
名曰滄州狼兒口導水碑蔡家窪與狼兒口毗連
卽其地以名之耳

本朝乾隆十二年開挑出蔡家窪通流於是九撥橋之
流遂廢而新河被以新名迄今豐碑屹立遺迹猶
可考也二十九年興修水利復議開濬分別爲緩
而止方輿紀要浮河舊志云在清池縣南二十里

漢時自大河分流東北出浮陽縣南又東北入於海今自東光縣南界之永濟渠分流而東北流亦注於海十三州志浮水東入海其西南二十三里有迎河從南皮縣來分漳水以入於浮水迎河故道卽今南堂樂寰宇記浮水源自東光縣南界永濟渠分出東北流逕滄州南十里又北逕州城東一里又東北入於海畿輔通志浮河在滄州東南五十四里自河間府東光縣東北逕州界又東逕

鹽山縣東入於海鹽山縣志浮河在縣東北百餘里自東光縣南經滄州界入縣境達海久淤浮河故道疑自滄州舊城東由周郭莊入鹽山縣而唐時陽通河在廢清池縣南十五里當亦在其處石碑所行之道大約參入二河遺迹而成者也今東光滄州鹽山界無復有浮水毛河之目蓋水流變遷漢唐遺迹不可復問久矣然指爲馬頰則流俗之尤誤者也又今舊滄州城漢浮陽縣也水北曰

陽而石碑河適當城南是河之爲古浮水有徵矣
鹽山縣志浮河在縣東北今石碑河下尾入母猪
港歸海者正值鹽山縣北一百十里又明徵也
捷地引河一名南減河又名磚河首起滄州南十五
里捷地衛河東岸明宏治中開旋塞

本朝雍正四年重開東流逕八里屯又東北逕風化店
火寺小吳家莊鄭家口折而東南流二十里入於母
豬港會石碑河穿大溝窪長港小西河入於海

方輿紀要減水河在滄州南十五里西接衛河東達於海宏治中開以備衛河之泛溢旣以去海尚遠漲水往往由此決入田間大爲民患乃復塞之

滄州志有二磚河西路磚河舖有磚河鎮南路

十一坊有磚河又南路新增集曰捷第曰磚河

羅參

此磚河是滄州南路之磚河集也捷第卽捷地舊名絕隄

二統志減水河有

二一在滄州南十五里曰磚河

興濟引河一名北減水河亦明宏治中開首起青縣

興濟鎮東北流逕北蔡家莊入滄州東北境又東北逕乾符城南又東北流逕桃園又東折南轉凡二十里其流散漫入於小西河會南減水河入於海

謹案南北二減河明宏治中開後久而湮塞閘石猶有存者

本朝雍正三年衛河溢決十三口四年興修水利因其遺迹重濬磚河一百二十里原長一百九里興濟河八十

里原長九里各建滾水壩引分水入海河滄州水勢

藉以宣洩居民賴之乾隆二年青縣挑挖減河用地一十九頃三十八畝八分一釐零六年河屢決南減水河南岸二十餘丈更築遙隄今南減河起衛河東岸捷地東流逕于家莊風化寺迤邐東北流逕白兔崔家莊畢馬站夏家莊大寺朱家口大寺小吳家莊王吉家莊官莊良口高家口王大本家莊吳家橋孫正家莊劉三家莊寶家莊與石碑河會流入母豬河又東北爲海河至岐口而入海面

寬九尺底寬五尺深六七尺不等乾隆二十年總
督方觀承題請特設風化鎮巡檢專司修濬北減
水河亦自衛河東岸起青縣興濟鎮之西馬官屯
東流至上下五旗新莊周龍莊打虎莊大杜家莊
景臺堡清水泊南北蔡家莊入滄州境之乾村有
乾符城又東流逕謝家莊隆兒莊又東流逕同居
三聚館桃園蘇家園道口大蘇家莊又東流與北
減水河會於海河而東入於海面寬九丈底寬五

丈深六尺至八尺不等自大蘇莊以下盡平陸鹹
鹺不毛之地舊有李村巡檢乾隆二十年題請將
興濟減水河專屬該員管理嘉慶十一年加高壩
底龍骨挑濬積淤 又案說者以北減水河卽古
平虜渠故道以乾符城卽舊平虜地也然魏武所
開平虜渠甚遠起自饒陽因饒河故瀆而成此特
其下尾耳詳見滹沱河篇

九女河

畿輔通志在滄州東七十里劉志九女修行後合
葬一邱有九女塚

謹案長蘆志九乃女行次非有九人也此河卽今
南減水河猶有九女村在河之陰

甘井

滄州志在舊城內唐書地理志滄州清池有甘井
開元二十年縣令毛某母老苦水鹹無以養縣舍
穿地泉湧而出民謂毛公井

李滌淀

方輿紀要在滄州西十里舊爲鍾水處

謹案是淀亦見唐書地理志

薩摩陂在滄州東北五十里周數十里今湮

元和郡縣志陂在長蘆縣北十五里周五十餘里
有蒲漁之利

唐渠

唐書地理志一在清池縣東南二十里注毛氏河

一在縣東南七十里注漳並引漳水皆刺史姜師度開

馬落陂在滄州東北十八里

午清池在滄州東南五十里卽今仵龍堂也一名大梁五龍堂其水味鹹古鹽池也周數里已無池形但地勢窪下耳雨冬之年漚水灌注平時則涸池北里許有土岡岡上卽龍堂也廟前數十丈有八角井圍二丈餘大旱不涸土人云通海眼

太平寰宇記在清池縣東十九里水澄味鹹未嘗
枯涸 齊乘午清池今曰大梁五龍堂元至元丁
亥重濬 二統志浮陽城南有大連淀魏延興二
年淀水溢注破午清村因爲池時有鱖魚言與海
通 明勝志清池卽古鹽池漢平帝詔瀕海鹽池
且勿禁以資利者也

蔡家窪一名邱淀在滄州南五十里其上源爲馬頰
其下流爲石碑河周二十餘里

大連淀在滄州東南六十里直舊滄州城南十五里
西去蔡家窪五里周四五十里

南堂窪在滄州東北一百十里又北爲中堂窪與靜
海縣接界又北爲北堂窪與天津縣接界宋時三堂
淺也

謹案天津府志中堂窪內有碑云興唐大定十年
敬德脩嘉靖二十二年重脩考唐無大定年號敬
德不知何許人殆不足信也

三角淀在滄州東北九十里周七八里石碑河下尾入之

母豬港在三角淀東與相接連捷地減河下尾入之其入處分三支西曰李鳳口中爲周家北溝東曰至

堂灣

大溝窪在母豬港東北與相接連周七八里其相通者曰李金口

長港在大溝窪東北與相接連周十餘里其相通者

爲張讓家溝

小西河在東港東北周三四里由長港入小西河其相通者曰四里港與濟滅河下尾入之下流注岐口入於海

謹案以上一淀三窪二港一河地勢互相接連石碑河南北二滅河皆貫之而出其入海處南曰岐口北曰馬棚口

清河在青縣西南境其上源故城縣之沙河也本漳

河支流自縣南二十六里上接交河縣界北流入境
又東北流逕祝家嘴入於舊滹沱河往時漳河與滹
沱河合流由鮑家嘴入運今已築隄斷流詳見漳河
滹沱河二篇

謹案此河本漳河舊流經祝家嘴會滹沱河入運
其上交河縣境者又有漫河樂河普頭河

三河皆詳漳河

篇

交會於新挑溝蓋漳滹兩河之支流交錯者乾隆
二十九年興修水利動帑重濬面寬八丈底寬

四丈深三尺

鮑家嘴引河在青城縣東南往時漳河會滹沱河自康熙三十六年全漳入衛爲滹沱溢陽二河會流之道雍正四年於獻縣之完固口築隄遏滹沱收流大城靜海之子牙而鮑家嘴之流遂絕

獨流河在靜海縣北二十里

方輿紀要自興濟縣西北四十里而至青縣有獨流河其地多蒲葦之利黃御二河皆溢於此舊志

云黃御之支流也又北流注於易水昔時河流甚盛其後黃御分流遂至淺塞

謹案獨流鎮今屬靜海其地直黑龍港水之下尾卽紀要所謂北注易水者也

逆河在靜海縣東七十里滄州剖分中界首起縣東南一百里之南堂窪北流逕種福堂亂塚入天津縣之秋漢港凡六十里微有河形而已詳見運河

謹案宋史河渠志滄州舊有三堂等塘泊爲黃河

所注後河敗而泊塞程昉嘗請開琵琶灣引河水而功不成熙寧六年屯田使閻士良請堰水經御河引塘水漑之乃命士良專興修撲椿口增灌東堂淀泊方與絕要三堂灤在舊清池縣北又逆河在南皮縣城北卽衛河之支渠也舊有逆河濱自縣境東流入潯沱合於浮水今湮今考此河當卽是宋時倒流河

權家口河首起靜海縣城北三里運河東岸雍正初

運河決權家口北趨天津縣怡賢親王議卽決口開河引流東北至白塘口入海河歸海以洩運河盛漲旣施工而中止今湮

寬河未詳何時所開靜海縣東北三十五里有寬河村是古有是河而村以河名也今村西南河形尚存村之東北不可尋究議開權家河時卽以是河爲下尾至今諸村瀝水皆滙於此下入波水窪

護城河卽天津郡城濼也環城周長十二里由城東

南隅之大閘入於海河

謹案郡城地形北高南下潮水入大閘至東西二門而止故護城河北面恒涸由東而北民舍尤密河身寬不及丈居民傾棄糞土填淤更易乾隆二十八年重脩郡城濠亦重脩而東北之濠無地可展惟去其淤而已水終不能至也又天津縣志稱此爲閘河引天津衛志云城東南角石閘一座引海河潮水周城四面夫城必有濠所以護城故凡

城皆有護城河不必因一隅之閘而卽被以閘名也

官地窪在靜海縣東南五十里又東爲臭魚窪西北爲四里港窪

窑窪在靜海縣東南四十里又東爲羅家港亦曰羅家窪

劉家舖窪在靜海縣東南三十里又東爲團窪亦曰團泊

大浪泊在靜海縣東北四十里亦曰大清水淀又東卽大河坑也

大黃花泊一名大泊在靜海縣東北六十里西接大浪泊東接小黃花泊小黃花泊一名小泊

東單套窪在靜海縣東北十里

波水窪一名大泊又名大淀俗名拋水窪在靜海縣東北與天津縣接界在大河坑西北五里其東爲青寧侯大河坑在大黃花泊西北大河坑西北爲清水

淀大河坑東爲張家泊張家泊西北爲楊家泊又波
水窪西北爲大南河大南河東爲小南河

中堂窪在靜海縣東北一百里北接天津縣之北堂
窪南連滄州之南堂窪宋時總名三堂濶其中荒穢
叢生絕無人烟雍正九年戶部議中堂窪內有逆河
一道西屬靜海東南屬滄州東北屬天津立石分界
今逆河微有舊迹北行入於天津之秋漠港

謹案西屬靜海者卽中堂窪東南屬滄州者卽南

堂窪東北屬天津者卽北堂窪方輿紀要三堂濼
在清池縣北宋志云滄州北舊有三堂等塘濼爲
黃河所注後河改而濼基程昉嘗請開琵琶灣引
河水而功不成熙寧六年屯田使閻士良請堰水
絕御河淀濼今皆湮廢

八里窪在天津縣東南三十里直雙港引河之南

柳淀窪在天津縣東南二十里何家圈引河穿之而
過

北堂窪在天津縣東六十里

謹案自天津北堂窪至滄州南堂窪凡八九十里
又自南堂窪三角窪母豬港大溝窪凡三四十里
中堂窪其總名也東南爲三角窪大溝窪母豬港
長港小西河南爲官地窪臭魚窪窯窪羅家港劉
家鋪窪團窪大泊小泊大河坑大小黃花泊青寧
侯蘆北口東單套窪波水窪秋漠港中間荒蕪叢
蘆廢河曠土人跡不到者不可勝紀北堂窪在天

津縣海河之南不及二十里南堂窪在滄州海河西北不過二十里古黃河入海不當在是耶

黃家潭在天津郡城內東北隅周半里

水窪四皆在天津郡城內一卽黃家潭一在東南隅又名水月池周二里一在西南隅大與水月池等一在西北隅周一里餘均爲蓄洩城中瀝水之地

天津縣志郡城內水窪五四隅及縣署東各一東北窪頗深土人謂下有泉川旁爲黃氏居故名黃

家潭東南窪淺於黃家潭有水關通濠濠通海河
窪與潮並漲落積滯而流長隄中亘通以小橋水
月庵在其隈居人以水月池名之其三皆不知名
淺深與二窪等城內有溝出穢水以窪爲尾閭穢
氣所鍾惟水月池通潮視四窪較潔亦未能盡澄
邇成若斥鹵惟甜水一井廢塞已久居民草戶皆
仰給郭外識者議鑿窪而深各通水關牖啓閉以
時引潮水滌之穢水別由暗溝注濠不令入窪仍

深其濠以暢洩之阻之者爲郡本水鄉夏汛盛時
每橫溢原野若大開水關橫流由此入城居民皆
魚矣阻者第知防水之入不知內水之當出乎況
據地形城中高於濠塹濠水得入水月池者潮爲
之也若橫流之水非高於窪水不能逆上夫至橫
流高於窪水則城四門皆入水之道何必水關是
阻之者妄也又案今濠水惟東南有閘通海河蓄
洩極利東北久湮塞父老言其地本有閘通運河

前朝衛志尚載之不知廢於何時今并舊志不可得矣

謹案志言深溝之說是也謂穢水別由暗溝注濠不令人窪則斷不能蓋城內以鼓樓爲中心四隅衙衙各有暗溝以受諸穢洩之四角大淀此舊志也穢水無由舍大窪別有注濠之路至以阻之者第知防外而不知防內是也若謂城高於濠濠不能高於窪則又不然城中地形固高於濠而四角

大窪正與城濠相等濠水滿則由水關倒灌入窪
勢所必至古人所以於水關之外另立小閘以司
啓閉內水滿則開閘洩諸濠而達於海河內水涸
則開閘引潮水以入於大窪而滌諸穢惡外水盛
則閉閘使不得入城又何慮橫流之內潰耶又考
郡城地勢北高南下故今城濠之水在南者濠淺
而常盈在北者濠深而常涸大雨時行則北濠之
水悉注南濠有閘通海河久旱水淺則候潮信啓

閘引潮水入濠積雨水滿則視潮落啓閘洩水入海河水正適用則閉閘使潮不能入水不能出若北濠之外卽爲運河濠與運中間相隔近者不及半里遠者不及二里運河地勢較濠尤高故此濠不宜深濬有防運河穿地而入卽漫溢矣又焉可建閘如開門揖盜耶舊云前明有閘通運畧無故迹可尋始不足信也至所謂縣署東水窪本非蓄水之地特以地勢窪下爲水所鍾耳自乾隆二十

九年開通水溝之後三十年重加修濬挑挖水月池此窪之水悉田暗溝入東南大窪今已乾涸矣蒹葭套在天津郡城內

謹案東南大水窪南北縱六十丈東西橫九十丈周圍幾及二里居人所稱水月池是也窪南城根下開鑿水洞城外舊岸復開小渠達於城濠復於城根水洞之外建立小閘以司啓閉窪內爲水關城中東南一面以及東北半面之近南者其地溝

穢水悉注此窪由水洞達城濠洩入海河復由水洞引潮入窪由窪入地溝盪滌臭穢此古人善制也其後地溝淤塞四隅水窪亦皆淤淺水洞堙閉閘座圯廢街衢填高居民常苦濕寧四窪穢氣尤甚乾隆六年天津道陶正中議於東南大窪之中別築土埵形如葫蘆名葫蘆套引潮水先入套內以供民用施工幾半未成而去乾隆三十年春知府金文淳請動閒款開挑池溝勸令郡人各按所

居門面凡有力之家自行開挑以木板橫臥兩旁截木爲柱夾立溝內柱架以梁鋪木板蓋之覆土其上溝形大小視街形寬狹遠近相通悉注於窪又令郡人起除街土或一二尺至於三尺土去而民居始高出街衢之上水由街入溝無濕澤之患三十一年開挑東南大窪起土八千餘方而窪始深溝中穢水達窪無阻復於溝中圍築土埦以成葫蘆套之制以城根水洞爲葫蘆口其長三十丈

寬一丈自是展寬圍圓爲葫蘆腹縱二十丈橫三十丈土埦均高五尺頂寬一尺底寬三丈套南直按水洞東西北三面坑水圍之於葫蘆口兩旁各爲涵洞一使坑中穢水由套出水洞入瀆於葫蘆腹兩旁亦爲涵洞二使潮水入套由涵洞洩入坑內周流不絕居民用水卽取給套內以免濫渾之苦由是潮水由水洞入套由套洩窪窪水由套口出濠由濠入海涵兩不相雜穢水爲清水滌滌穢

氣盡除其西南面大坑廣濶與水月池等城根亦有水洞通濠亦可建設葫蘆套以供民用尚未舉行

馬蹄泉在葛沽東南三里地名楊家岑有大沙陵泉在陵旁深尺許周二丈許泉旁之水皆鹹此獨甘鮮可飲